


**PARTORDING NI ULAON
DI PARPUNGUAN MANOGOT NI ARI HAHEHEON
(BUHABUHA IJUK)**



HURIA KRISTEN BATAK PROTESTAN (HKBP)

Minggu, 20 April 2025

1. Joujou Tu Parsombaon (U = Uluan; H = Huria; S = Sude)

----- tangiang na hohom -----

U: Selamat Paskah ma di hita saluhutna! Nunga hehe Tuhanta jala mangolu di tongatongata.

H: Selamat Paskah ma tutu!

U: Batu naung binolongkon ni angka pande bagas, i ma jadi batu parsuhi. Sian Jahowa do i masa, halongangan do i anggo di matanta.

H: Ari on do na jinadihon ni Jahowa, marolopolop jala marlas ni roha ma hita disi.

U: lale Jahowa, sai manumpak ma Ho! lale Jahowa, sai Ho ma mambahen manjadi!

H: Pinasupasu ma na ro marhitehite goar ni Jahowa, hupasupasu hami ma hamu, angka na sian bagas ni Jahowa.

U: Jahowa do Debata, jala Ibana manondangi hita. Tambathon hamu ma angka pelean pesta i sahat ro di angka tanduk ni langgatan.

H: Ho do Debatangku, jadi Ho do pujionhu; ale Debatangku, sai Ho do patimbulonhu.

U: Mandok mauiate ma hamu di Jahowa, ai pardengganbasa do Ibana, ai ro di salelenglelengna do asi ni rohaNa i. Marende ma hita mamuji Tuhanta i, sian

S: Marende sian BE No. 96 : 1 + 3 "Nunga Talu Hamatean"

♪ *Nunga talu hamatean, dibaen Tuhan Jesus i. Ai na hehe do Ibana, songon na nidokNa i. Haleluya, haleluya, nunga hehe Jesus i. Haleluya, haleluya, nunga hehe Jesus i*

(Jongjong)

♪ *Marlasroha be ma hita, ala hehe Jesus i. Ai malua sude hita, sian hamagoan i. Haleluya, haleluya, nunga hehe Jesus i. Haleluya, haleluya, nunga hehe Jesus i*

2. Votum – Introitus – Tangiang:

U: Marhitehite goar ni Debata Ama, dohot goar ni AnakNa Tuhan Jesus Kristus, dohot goar ni Tondi Parbadia na tumompa langit dohot tano on. Amen! Nang Ho mabiar, ahu do bonana dohot ujungna. Na mangolu do, jala naung mate do Au najolo, jala ida ma, ahu do na mangolu ro di saleleng ni lelengnya jala di Ahu do anakhinsu ni banua toru dohot hamatean.

H: Haleluya! Ai nunga mangarajai Tuhan Debatanta, Sigomgom saluhutna! Naung paheheon Tuhan Jesus i, paheheon ni i do nang hami raphon Jesus i, jala pajongjongonNa do hami raphon hamu.

U: Pinuji ma Debata, Ama ni Tuhanta Jesus Kristus, naung manubuhon hita paduahalihon, sian godang ni asi ni rohaNa, marhitehite haheheon ni Jesus Kristus sian angka na mate, asa marpanghirimon na mangolu hita. Haleluya! **Martangiang ma hita**: Ale Tuhan Jesus,

na mandok mauiate do hami tu Ho ala ditaluhon Ho do dosa dohot hamatean marhitehite hamamateM i. Ala disondangi Ho tanomannami, asa marpangkirimon na mangolu hami ala ni haheheonMi. Nandang pola be mabiar hami mida hamatean. Dipaunsat Ho do hami sian haholomon tu hatiuron, sian hamatean tu hangoluan. Antong pargogoi ma hami mamuji dohot mangoloi Ho ariari, pasangaphon Ho di bagasan haporseaon na mangolu, paima sahat hami tu lambungMu. Marhitehite Tuhan Jesus Kristus martangiang hami tu Ho. Amen!

---Hundul---

3. Marende sian BE No. 90 : 1 – 2 “Sai Tapuji Debatanta”

- ♪ *Sai tapuji Debatanta, ale hajolmaon i. Ai naung hehe do Tuhanta, sian hamatean i. Dipasidung Jesus i, ulaonNa sasude. Patupahon haluaon, di saluhut hajolmaon.*
- ♪ *Anggo utang ni dosangku, digarari Jesus i. Ido haporseaonhu, di na tinaonNa i. Nunga tulus patik i, nunga mintop rimas i. Di na hehe i Ibana, ro di au hangoluanNa.*

4. Epistel: Psalmen 97 : 1 – 6

U: Jahowa do Raja, marolopolop ma tano on, marlas ni roha ma pulopulo angka na lan i.

H: Ombun jala haholomon marimpotimpot humaliang Ibana, hatigoran dohot uhum ojanan ni habangsaNa.

U: Api mardalan di joloNa manganhon angka aloNa humaliang.

H: Disondangi angka hilapNa do portibion, jadi lalolalo tano on marnidasa.

U: Malala do angka dolok songon pantis maradophon bohi ni Jahowa, maradophon bohi ni Tuhan ni sandok tano on.

H: Dibaritahon angka langit do hatigoranNa, jala sude angka bangso marnida hamuliaonNa.

U: Ima sahatna. “Martua do angka na tumangihon Hata ni Debata, jala na umpeopsa.”

S: Amen!

5. Marende sian BE No. 91 : 1 – 2 “Hatuaon do”

- ♪ *Hatuaon do, las ni roha do, hangongot ni Tuhanta i. Mago do hita, ngot ma Tuhanta, las be, las be ma rohanta i. Mago do hita, ngot ma Tuhanta, las be, las be ma rohanta i*
- ♪ *Hatuaon do, las ni roha do, hangongot ni Tuhanta i. Monang do Jesus, talu sibolis, las be, las be ma rohanta i. Monang do Jesus, talu sibolis, las be, las be ma rohanta i*

6. JAMITA :

7. Marende sian BE No. 94 : 1 + 2 "ALE TONDINGKU NAUNG HEHE"

(PELEAN)

♪ *Ale tondingku naung hehe Tuhanmu. Nunga ditaban do banuatoru. Las ma roham ai martua ma ho, rap dohot Jesus mangolu ma ho, rap dohot Jesus mangolu ma ho*

♪ *Talu sibolis dibahen Tuhanta, nang hamatean nang dosa sudena Sai dihalashon rohanta ma i, pangoluonNa do hita sude, pangoluonNa do hita sude*

8. Parsuruon (Jongjong Sude Ruas)

U: Nunga hehe Jesus! Antong borhat ma hamu laho manghobasi ulaonNa i, sai didongani ma hita saluhutna mamboan barita haheheon i.

H: Rade do hami laho mamaritahonsa tu sandok portibi on mamboan barita las ni roha i.

U: Ditaluhon Ibana do hamatean i, antong las ma rohanta jala baritahon ma barita hamonanganNa i. HamonanganNa i ma na margogoihon hita manghatindanghon Ibana tu sandok portibi on.

H: HamonanganNa i do na gabe hamonangan ni saluhut angka na porsea, hamonangan ni hatigoran dohot hasintongan, hamonangan ni saluhut ulaon laho patingkoshon uhum tu angka na metmet jala na dangol; jala loas ma hami gabe parsidohot di saluhutna i.

U: Nunga marpadan be hamu dohot Debata, alani laho ma hamu, ulahon hamu ma i, jala jalo hamu ma pasupasusian Debata.

S: Mangendehon BE No. 632 : 1 "Nunga Hehe Kristus" BL. 632

♪ *Nunga hehe Kristus marsihohot ma hamu. Lam sumurung hita di ulaon ni Tuhanta. Lam sumurung hita di ulaon ni Tuhanta. Radot ma hita lao mangula tu Tuhanta. Radot ma hita lao mangula tu Tuhanta, Amen.*

U: Tangiang Pelean

S: Ale Amanami na di banuaginjang,...

U: Pasupasusian:

H: (Mangendehon:) Amin,... Amin,... Amin,...!